

PABLO NAAJIONEE TITOOCUARA

Pablo naajiosacari Titoocuara

1 ¹Janiyari Pablóni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiuutiniuria Jesuucua, Pueyaso pueya nojori quiniuria. Cua jiyaroquiaarijiaariuhua Jesuucua tiuuníaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara.

²Nojori tojishacari cuno rupaa, nojoriiri niishiquíaa nojori cutaraari samiitiani-shaanutaniuhua Pueyaso muerasu nojori quiniuucua, pueyaracaanu quijiaca nojori quiniuria Pueyasota. Cunocuaajaari tariucuacaanu Pueyaso sequesano, jiyanoehua tarijiatej, jiya shipinishaacariji-yojua. Nojuajaari maja na naata sapojonu.

³Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuacaanucujani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiuutiniuria nocua. ⁴Quiarijiani, quiocuara naajiyani-jia Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuquiaari-cuaani. Naacujitij, paari mariyata nocua tiuujiacani. Pa Que Pueyaso, pocuaji Tacuna Jesucristonio, nojori cuara cumaquiiiria quiajaniya. Nojori cuara jiitiaara quioojia maninia, shuquiriaatia quia quiniuria pueyaracaanu.

Titora Pablo sequesano, Creta jiya tucuaatiajajinia na miishocoriquiano

⁵Janiyari quia tiujiaquiaari Creta jiya tucuaatiajajiniani, quia tucuatánura cua poonijiosano cureeno. Naaratej, quia sequecanunijia quia jiyatenura jiyaniijia-nucua, Pueyaso muerasu maapue jiitianaa quiniuria puetunu cuno jiya tiacajiniajanaa, taa cua sequequiaari quiajaniyacujani. ⁶Pueyaso pueya jiitariquiano cuara quiiiria maninia pueyano, sesa miyashijia, maja pueya pocuanura sesa nojuajiniji. Cuaara jiitiaara niquiriyatujua niquiocua. Necohua cuara quiiiria Pueyaso muerasujuhua, maja sesa miijiaca, maja tojiyashijiacajuhua. ⁷Cante Pueyaso muerasu jiitianani, nojuajaari Pueyasora poonijiojua. Naaratej, nojuaja cuara quiiiria maninia quijia, sesacasoo, maja tojiyashijia. Cuaara quiaquiiiria ritia juaajia, mashaasequejojua, piyojotaja. Cuaara quiaquiiiria cumaneeca panijia sesa na miishanota na masenura. ⁸Naajuhua, Pueyaso pueya jiitiana cuara quiiiria ruconoacua taraajeja. Cuaara quiiiria maninia miiijia, maninia niishirio-jojua. Cuaara quiriaruhua seetanujanaa Pueyaso rootasano tojjia, maja rimiajata maninia miiijia. Cuaara quiriaruhua Pueyaso panijia cutara, tama na cuaque-yajaaja jiitiaja maninia, maja sacuaraatia casaa porocua. ⁹Cuaara quiiiria Pueyaso rupaa tojjia cutara, taa na niishitiojosaa-

quiaaricuajani. Naacuaajitij, nojuaja na naata pueya cumaquiniu, maninia na niishitiojosanota Pueyaso Rupaaajiniji. Naacuaajijuhuaj, nojuaja na naata pueya tacatonuhua Pueyasoocua sesa nojori niishishanojiniji, noo pojori canapuate Pueyaso Rupaa ruuretajaca quiyacuajani.

¹⁰Naa quia sequereenijia, queraatia tojiyashijiaca pueya quiniuucua, canapuate juhua niishiyashijia niishitiojo-quiaa najuhuana niishitiojosanocujani. Nojoriiri Pueyaso muerasu sapojiya. Queraatia cuno pojoriiri cuarta Judiocuaca. Nojoriiri pueya niishitiojiya pueya cararaatiuuquia co miatesaanura, taa Moisés niishitiojoquiaari tarijiacuajani, seetanujuanaa Pueyaso muerasu nojori quiniuria juucua. ¹¹Nojoriiri queraatia niquiohuaraca pueya jiyajeneteya sesa na niishitiojosanota, puetunu tapueyocuatajanana nojori juayonuujutanura. Cuno niishitiojonaa cuaara sanaajasaaria. Nojoriiri niishitiojoquiaa saaja cumanee-ca nojori masenura sesa na niishitiojonuunujiniji.

¹²Creta jiya tucuaatiaja pueyajinijinio tamonu shimiacuuri tama na pueyajinijijiaaja naa sequequiaaritij: “Creta pueyari pueyaracaanu saaja sapojonuujua. Nojoriiri jiyanhua juaajiaca juhua sayoru. Nojoriiri puera miaquenuujua. Nojoriiri taajecorijihuaj”. ¹³Seetanujua-naari cuno shimiacu sequesano. Nocuaji, jiyanhua quia nacasura nojori, nojori cuaara Pueyaso tojijiaca quiiria, maninia quijiaca nojori quiniuria. ¹⁴Quia rootare nojori maja na tojtianura Judiocuaca nareja najuhuana pohuatasano, naajuhuaj, maja nojori tojiniuria pueya rootasano, canapuate Pueyaso seetanu rupaaajanaa tojiyashijiaca quiyacuajani.

¹⁵Pueyano jaara maninia jiuujiaraca quiri, puetunu casaajanaari maninia quiya nera. Saniniuujia, pueyano jaara sesa jiuujiaraca quiri Pueyaso rupaacua

tiuyashijia na quiniuucua, majaari quenaaja niquiriyatu casaa maninia quiniu nera. Na niishitiajaari juhua curuutuuca, noojiano. ¹⁶Nojoriiri tama na cuaqueyajaaja sequeya: “Pueyaso niishianijia”. Naa nojori sequesacaritij, najuhuana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanhua soosano pueya, puera sesa na quiniuucua. Nojoriiri jiyanhua sesa, tojiyashijiacajuhuaj. Majaari na naata quenaaja maninia miiniu.

Maninia niishitiojosano cutara

2 ¹Nocuaji, pueya quia niishitiojore maninia nojori quiniuria taa pa niishitiojosaquiaaricuajani. ²Naaratej, socua saaquiapue quia niishitiojore nojori cuaara quiyaquiiria miaquejoru, mashaa-sequejorunio. Nojori cuaara quiiria tojishano pueya cutara, maja rerequetesano. Nojori cuaara quiiria maninia niishiriojojuaca. Cuaara quiiria maninia quijiacajuhuaj, na tojishacari puetunu Pueyaso niishitiojosanojuanana, na panishacari pueyano. Nojori cuaara quiiriahua maninia rejeretajaca taraatia na miishacari, juhuajaniya nojori sashishacari pa Jiyaniijia. ³Naajuhuaj, socua motaja maajipohua quia niishitiojore nojori quiniuria maninia Pueyaso niquiara pueyaracaanu, maja rimiaacatu-juri, maja mashaasequenuujua. Nojori cuaara pueyaracaanu miiria maninia tamasaca niquiara, tamasaca miiniuria juhua nojori miishanojuhuaj. ⁴Nojori cuaara niishitiojora niyacaraca maajipohua, maninia na paniniuria neyaca, necohuano. ⁵Cuno jiyaniyacuaca cuaara niishitiojora narta maajipohua, maninia niishiriojojuaca nojori quiniuria, saaja neyaca panijia nojori quiniuria, maja tamonu caya panijiacara. Nojori cuaara niishitiojosaariajuhuaj, maninia poonijio-

juaca na tiajinia nojori quiniuria, caporatujuri nojori quiniuria, neyaca tojtiajacanio. Nojori cuaara naa miiria, Pueyaso Rupaa mariqui rerequetesaaree-ri.

⁶Naajuhua, mashiquiori quia niishitiojore maninia niishiriojojuaca nojori quiniuria. ⁷Puetunu quia miishanojuanaa cuaara quiiria maninia nojori niqiara, nojori jiaatianura quiocua, juhua quiajaniya nojori quiniurajuhua. Quia niishitiojosacari nojori, tama quia cuaqueyaja quia cojuare, tama quia niishitiojosanojuaja tojjia quia quiniuria. Majaari puenujua quia quiniu quia niishitiojosacari. ⁸Maninia quia niishitiojore Pueyaso Rupaa, taa quia niishitiojosaaquiaaricujani. Naacujitij, tamasaari maja na naata ruuretanu quiniutianiya quia niishitiojosano pueya niqiara. Naa maninia quia niishitiojosacaritij, quia niishitiojosano rerequetejacaari caririquiniutianiya. Naacujitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

⁹Poonitijosano pueya quia rootare, puetunu na camarucua sequesanojuanaa nojori tojiniuria, na camarucua shuquirianura nojori. Cuaara quiiria na camarucua panijaca, maja rihuanejaca. ¹⁰Cuaara nohuaseyaquiiria na camarucua casami. Cuaara quiiria seetanujanaa maninia miijiaca, pueya niishiniuria pa Jiyanoojia Pueyaso rootasanoori jiyanhua maninia cutara. Poonitijosano pueya jaara maninia quiriquia, Pueyaso Rupaari juhua maniniushitishano quia tamasa niqiara.

¹¹Paacujaaari niishiyani Pueyasoori jiyanhua jiyanoojia seetanujanaa, Jesu cusonuucua puetunu pueyacurajanaa, sesa pa miishanojiniji pa jiyanooshaanura. ¹²Pueyaso jiyanooshacari pajaniya, cunoori pa niishitiojiya pa cartenura

puetunu sesa pa miishanojuanaa, maja mijiria casaacua pa jiaatianura sacuaraa-tiajuhuaj. Naajuhua, Pueyaso jiyanooniucua pajaniya, cunoori pa shiniujiya maninia niishiriojojuaca pa quiniuria mijiria pa quishacarijia, maninia miijiacajuhua, Pueyaso tojjianio pa paniniutia nojuaja. ¹³Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquiaajuhua. Nojuacujaaari pa sequequiaari pa Pueyaso Cristoori pocua muetanutanihua, shacantuuca na cumaacajinia. Naacujitij, paari shuquiriaatia sashiya pa Jiyanoori. ¹⁴Nojuajaari tama na cuaqueyaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujinijianaa. Naa miiquiaariiri saaja tama na pueyaraja pa quiniuria, jiyanhua maninia miiniucua jiaatiajaca pa quiniurajuhua.

¹⁵Naa quia niishitiojore pueya Titonaa. Pueyaso pueya quia niishitiojore, quia shiniujiiri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequetereeri.

Maninia rootasano Pueyaso pueyara

3 ¹Quia pueya quia niishitiojorohua jiya jiyaniijia tojjia nojori quiniuria, jiyaniijianucua na jiyatesano pueya nojori tojiniurajuhua. Nojori cuaara cuno pojori naacutaara jaara sequesaa maninia casaa nojori miiniuria. ²Pueya quia niishitiojore nojori cuaara pueya sesacaashijaca quiriujuhua. Nojori cuaara quiiria juhujaniya quijiaca, maja juaajiaca. Cuaara quiiria jiyanoojiaca. Cuaara maninia niqiiria puetunu

pueyajanaa, juhua socua maninia pueya nojorijini, maja rimiajata na miiniuria tamasa.

³Tarijia, paari mariyata mosanucua quiquiaarini, Pueyaso tojiyashijiacano. Paari juhua tashucuanu quiquiaarini, sapojosano pa quishacari. Paari sesa miiniucua jiitiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniucua jiaatiajaca quiquiaarini sesa pa niishishano. Paari sesa mijiaca quiquiaarini. Paari tamasa jiitiasanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quijiaca quiquiaarini. Paari niquitiojuaca quiaquiquiaarini. ⁴Naajaa, pa Jiyanoojia Pueyaso cutaraari maninia miquiaari pajaniya. Naacujitij, paari niishitishaaquiaarini taa Pueyaso paniya puetunu pueyajanaani, na jiyaronuucua Neyanuniyojua pocuara na cusonura. ⁵Na muerasura pa jiyatequiaariiri saaja pocua na taraajesacari, maninia miyashijia pa quishacarijia. Sesa miyashijacara na Sohuanuta pa jataniquiaariiri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quiniuria. ⁶Pocujaji Tacuna Jesucristo miiniucua maninia, Pueyasoori jiyanhua queraatia na Sohuanu niquitioquiaari pajaniya. Juhua pocua totasaareeri na Sohuanu. Maja shiitianiyojua quenaaja. ⁷Naacujitij, pa jiyatereeri maninia quijiaca pa quiniuria na jiyanooshacari pajaniya. Naa pa jiyatequiaariiri na muerasu pa quiniuria, pa masenura puetunu na jiitiasanojuanaa puera, jiyocuaaanu na racatasano. Naaratej, paari juhuajaniya sashijiaani, pa niishishacari paari pueyaracaanu quijiaca quiniutianiya natani.

⁸Nio cua sequesanoori seetanu rupaajanaa. Nio rupaata quia nacasure Pueyaso tojtiajaca puetunu quioojiatajanaa, nojori

cuaara niishiriojora, maninia nojori miiniuria pueyaracaanu. Nio rootasanoori jiyanhua maninia. Maninia cutaraari puetunu pueya cumaquitarajanaa. ⁹Maja cutaraari quia rupenu cuno pueya, noo pojori canapue te najuhuaana nacojoquiaani, naajuhuj, noo pojori canapue te pueyaracaanu na supuetanaa sesaca serojoquiaa najuhuanani, juhua pueya shocotajaca nojori quiniuria. Naajuhuj, maja quia rupenu noo pojori canapue te juaatooquiaani, canapue te tariucuaaanu Moisés Rootasanoocua juayonuutaquiaacujani. Puetunu cuno nojori niishishanojuanaari najuhuanaj. Majaari na naacunu nojori.

¹⁰Quia piriyojore cuno, cante Pueyaso muerasu maanu raquirijitiaani, capa na niishitiojosana najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja cuaara quiriiaqui juhua taanuusano. ¹¹Naa na tojiyaquishacari quiajaniyatej, quiocua niishiri cuno pueyano tari seseree. Tama sesa na miishanojuaarjia juhua nocuara saquiriojata.

Pablo sequesano Titora

¹²Janiya jaara Artemas jiyarore quiocuani, jiyanhua quia saniniujiuri cucua quia niniuria Nicópolis tiacajinia. Janiyari quiniqui shuniya tajitini paniani. Janiya jaara Artemas jiyaroyaquiri quiocuani, janiyari Tíquico jiyaronutianiya quiocuani. ¹³Zenas, Apoloori quiocua tiuquiniutianiya. Nojori quia naacutare quia jiitiasanota, nojori jiitianura puetunu na panishanojuanaa nojori quianu panishacari quia quijiajiniji. Zenasri pueyacuaji tacuna pueya nequesoreenaa.

¹⁴Parta Pueyaso muerasu cuaara niishiiria maninia mijiaca nojori quiniuriajuhuaj, maja najuhua quijiaca na quiniuria. Maninia cutaraari nojori naacutanura na panishano jiitiaashijia.

Naajioneer puequesacari saruhuatasano

¹⁵Puetunu cuata quiniaajanaari cua
sequeya cua saruhuatanura quiajaniya.
Canaara quia saruhuatate parta Pueyaso

muerasujuhuj, canapute canaa
panijiacacuajani. Pueyaso cuaara
cumaquiiria puetunu niajanijajanaa.
Cuaara naa quiiriatej. Tariucuaja
Titonaa.